

## **Resolución da Axencia Galega de Infraestruturas, pola que se aproba provisionalmente e se acorda someter o expediente de modificación do Catálogo da Rede Autonómica de Estradas de Galicia a información pública e ao informe das administracións territoriais afectadas**

### **ANTECEDENTES**

A Lei 8/2013, do 28 de xuño, de Estradas de Galicia, establece, no apartado 1 do seu artigo 10, os catálogos de estradas como os instrumentos públicos que serven para identificar, inventariar, clasificar e, se for o caso, categorizar funcionalmente as estradas das redes de cada administración titular.

O Catálogo da Rede Autonómica de Estradas de Galicia foi aprobado polo Decreto 100/2021, do 24 de xuño, que foi publicado no Diario Oficial de Galicia número 129, do 8 de xullo de 2021.

No apartado 6 do artigo 10 da antedita Lei 8/2013 indícase que terán a consideración de modificación dos catálogos de estradas e dos inventarios de travesías: o cambio de titularidade de estradas, travesías ou treitos delas, segundo os procedementos daquela lei; a construción de novas estradas ou de novos treitos das estradas existentes; a adquisición ou perda da condición de estrada dunha vía pública; a consideración como travesía dun treito de estrada, cando non se tramitase un expediente ao respecto para o seu recoñecemento; o cambio de categoría funcional de estradas, cando non se tramitase un expediente ao respecto; e o resto de supostos previstos regulamentariamente.

A ese respecto, o Regulamento Xeral de Estradas de Galicia, aprobado por Decreto 66/2016, do 26 de maio, recolle, no seu artigo 22, os supostos de modificación dos catálogos de estradas contidos na Lei 8/2013.

Pola súa parte, o artigo 20 bis do Regulamento Xeral de Estradas de Galicia, aprobado por Decreto 66/2016, do 26 de maio, desenvolve o procedemento de tramitación dos catálogos de estradas e das súas modificacións.

Finalmente, o apartado 3 do artigo 10 da Lei 8/2013 establece que as respectivas modificacións do Catálogo da Rede Autonómica de Estradas de Galicia serán aprobadas polo Consello da Xunta de Galicia, por proposta da consellaría competente en materia de estradas, mediante decreto.

O procedemento de aprobación dos catálogos de estradas e das súas modificacións desenvólvese no artigo 21 do Regulamento Xeral de Estradas de Galicia.

Dende a última modificación do Catálogo da Rede Autonómica de Estradas de Galicia, aprobada polo Decreto 30/2023, do 30 de marzo, téñense identificado dúas vías públicas de titularidade autonómica que son estradas, unha por construción dun novo treito





continuación dunha estrada existente e a outra por incorporación dun treito por cambio de titularidade a prol da Comunidade Autónoma de Galicia, que non están incluídas nel.

Así, o 19 de abril de 2023 púxose en servizo un novo treito, recentemente rematado, entre o enlace de Leirado coa estrada autonómica PO-402 (PQ 2+300) e a PLISAN (PQ 4+530) da estrada autonómica AG-51 Saída 291 Lira (A-52) – PLISAN.

E, por outra parte, o 2 de agosto de 2023, publicouse no Boletín Oficial do Estado e, simultaneamente, no Diario Oficial de Galicia, o Real Decreto 596/2023, do 4 de xullo, sobre o cambio de titularidade dun treito da estrada do Estado AC-12, na provincia da Coruña, a favor da Comunidade Autónoma de Galicia, e conseguinte modificación da Rede de Estradas do Estado.

O antedito cambio de titularidade implicou que a Comunidade Autónoma de Galicia asumise a titularidade do treito da estrada AC-12 entre os PPQQ 1+600 (antes do enlace coa estrada AC-10, aproximadamente na intersección da avenida de Oza coa vía de servizo da marxe esquerda) e 4+160 (pasado o enlace coa AC-11 na Ponte Pasaxe, na conexión coa antiga estrada autonómica AC-211), ao seu paso pola cidade da Coruña.

O cambio de titularidade formalizouse mediante a sinatura da correspondente acta de entrega, con data 24 de agosto de 2023.

O apartado 6 do artigo 10 da Lei 8/2013, do 28 de xuño, de Estradas de Galicia establece que *"terán a consideración de modificación dos catálogos de estradas"*, entre outros supostos, *"o cambio de titularidade de estradas, travesías ou treitos delas, segundo os procedementos da lexislación de estradas de Galicia"* e *"a construción de novas estradas ou de novos treitos das estradas existentes"*.

Polo tanto, a incorporación ao Catálogo da Rede Autonómica de Estradas de Galicia tanto do novo treito, recentemente construído, entre o enlace de Leirado coa estrada autonómica PO-402 (PQ 2+300) e a PLISAN (PQ 4+530) da estrada autonómica AG-51 Saída 291 Lira (A-52) – PLISAN, como do treito da estrada AC-12 entre Os Castros (PQ 1+600) e A Pasaxe (PQ 4+160), cuxa titularidade foi asumida pola Comunidade Autónoma de Galicia ao abeiro do Real Decreto 596/2023, do 4 de xullo, ten a consideración de modificación do antedito Catálogo da Rede Autonómica de Estradas de Galicia.

Ademais, é de aplicación o procedemento de tramitación dos catálogos de estradas, e das súas modificacións, que se establece no artigo 20 bis do Regulamento Xeral de Estradas de Galicia e que, no seu apartado 2, indica que *"cando os catálogos de estradas categoricen funcionalmente as estradas, incorporarán, cando menos, os documentos que xustifiquen a categoría funcional que se lle propón asignar a cada estrada ou tramo de estrada"*.

Como consecuencia de todo o anterior, para que esas vías públicas adquieran a condición de estradas de titularidade autonómica, é precisa a modificación do Catálogo da Rede Autonómica de Estradas de Galicia, ao abeiro do apartado 6 do artigo 10 da Lei 8/2013, do 28 de xuño, de Estradas de Galicia.

A Axencia Galega de Infraestruturas elaborou unha proposta de decreto para a modificación do Catálogo da Rede Autonómica de Estradas de Galicia, que ven acompañada dunha memoria xustificativa da categoría funcional que se propón para os novos treitos de estradas que se deben incorporar á Rede Autonómica de Estradas de Galicia.





## CONSIDERACIÓNS LEGAIS

O artigo 20 bis do Regulamento Xeral de Estradas de Galicia, aprobado por Decreto 66/2016, do 26 de maio, regula o procedemento para a tramitación dos catálogos de estradas, e das súas modificacións, establecendo que serán aprobados provisionalmente pola correspondente administración titular e, posteriormente, someteranse a un trámite de información pública e, simultaneamente, ao informe das administracións territoriais afectadas.

Á vista de todo o que antecede,

## RESOLVO:

1. Aprobar provisionalmente a proposta de decreto para a modificación do Catálogo da Rede Autonómica de Estradas de Galicia, que se xunta como anexo a esta resolución.
2. Someter a antedito expediente a un trámite de información pública que se levará a cabo durante un prazo de trinta (30) días hábiles.

Durante ese prazo, a documentación que forma o expediente estará a disposición da cidadanía na páxina web oficial da Consellería de Infraestruturas e Mobilidade e, en días e horas hábiles de oficina, nos locais da Axencia Galega de Infraestruturas en Santiago de Compostela (Edificio Administrativo de San Caetano, s/n), nos Servizos Provinciais da Axencia Galega de Infraestruturas na Coruña (Rúa Vicente Ferrer, 2 ) e en Pontevedra (Avenida de María Victoria Moreno, 43, 1º), e nas Casas dos Concellos da Coruña (Praza de María Pita, 1) e de Salvaterra de Miño (Praza da Constitución, 1).

As alegacións presentadas neste procedemento deberán versar sobre a identificación das estradas incluídas no catálogo, sobre os datos que as definen e sobre a xustificación da clasificación técnica e da categorización funcional das estradas na forma proposta no catálogo de estradas.

3. Someter a antedito expediente ao informe dos Concellos da Coruña e Salvaterra do Miño, das Deputacións Provinciais da Coruña e Pontevedra e da Administración Xeral do Estado, como administracións territoriais afectadas polo expediente, para que, nun prazo de trinta (30) días hábiles, examinen a categorización funcional proposta no catálogo de estradas e emitan informe ao respecto, no ámbito das súas competencias.

Santiago de Compostela, á data da sinatura dixital

O director da Axencia Galega de Infraestruturas

Francisco Menéndez Iglesias  
(documento asinado dixitalmente)

